

दिनांक 24.11.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- न्यायमूर्ति सूर्यकांत सुप्रीम कोर्ट रा 53 वां मुख्य न्यायाधीश बण्णा-राष्ट्रपति द्रौपदी मुर्मू वां ने पद री शपथ दिरायी।
- देश रा बारह राज्यां मांय चाल रह्या मतदाता सूची विशेष गहन पुनरीक्षण अभियान मांय राजस्थान अव्वल-4 करोड़ ऊँ बत्ता गणना प्रपत्र अपलोड करी ज्या।
- पांचवां खेलो इण्डिया युनिवर्सिटी गेम्स रो जयपुर रा सवाई मानसिंह स्टेडियम मांय आगाज।
- हिन्दी फिल्मां रा ही-मैन धर्मेन्द्र 89 साल री उम्र मांय देवलोक व्ह्या-फिल्म जगत अर वां ने पसंद करण वाळां मांय शोक री लहर।

000

न्यायमूर्ति सूर्यकांत आज सुप्रीम कोर्ट रा 53वां मुख्य न्यायाधीश रा तौर ऊँ शपथ लीनी। राष्ट्रपति द्रौपदी मुर्मू वां ने राष्ट्रपति भवन मांय राखी ज्या कार्यक्रम मांय शपथ दिरायी। न्यायमूर्ति सूर्यकांत न्यायमूर्ति बी.आर. गवई री ठौड़ सुप्रीम कोर्ट रा मुख्य न्यायाधीश बण्णा है। न्यायमूर्ति सूर्यकांत 1984 मांय हिसार ज़िला न्यायालय मांय वकालत सरू कीनी। अक्टूबर 2018 मांय वां ने हिमाचल प्रदेश हाई कोर्ट रा मुख्य न्यायाधीश अर मई 2019 मांय सुप्रीम कोर्ट रा जज बणायी ज्या। न्यायमूर्ति सूर्यकांत लगभग 15 महीना ताई ई ओहदा माथे सेवा दे सकेला।

000

देश रा 12 राज्यां मांय चाल रह्या वोटर लिस्टां रा खास गहन पुनरीक्षण कार्यक्रम रा तैत राजस्थान 4 करोड़ ऊँ बत्ता गणना प्रपत्र अपलोड कर र अव्वल है। मुख्य निर्वाचन अधिकारी नवीन महाजन आ जाणकारी दीनी। वे बतायो के विशेष गहन पुनरीक्षण-2026 रा काम रा तैत 1 हजार 800 ऊँ बत्ता बीएलओ रो मान करी ज्यो है। उदयपुर रा बाबूलाल पुजारी अर चित्तौड़गढ़ रा सूरजमल धाकड़ समेत न्यारा-न्यारा बी.एल.ओ. सौ फीसदी उपलब्धि हासिल कीनी है। सवाईमाधोपुर रा रिटायर्ड कर्मचारी कल्याणमल मीणा दिव्यांगता रे बावजूद टीमवर्क ऊँ मदद कीनी। श्री महाजन कह्यो के अ बीएलओ साबित कीनो है के किण ई मोटा लक्ष्य ने हासिल करण सारू शरीर री नहीं बल्कि मन स्वस्थ व्हेवणो जरूरी है।

000

मुख्यमंत्री भजनलाल शर्मा आज जयपुर मांय वां रा रेहवास माथे जनसुणवाई कीनी। ई मौके वे कह्यो के अन्त्योदय ही राज्य सरकार री योजनावां रो खास लक्ष्य है। श्री शर्मा सामाजिक न्याय, ग्रामीण विकास, राजस्व, शिक्षा अर चिकित्सा समेत न्यारा-न्यारा महकमां ऊँ जुड़्या मामलां री सुणवाई कीनी अर केई परेशानियां मौके ई निपटायी।

000

अन्य पिछड़ा वर्ग आयोग रा अध्यक्ष रिटायर्ड जज मदन लाल भाटी आज भरतपुर नगर निगम मांय संभाग स्तर रा संवाद कार्यक्रम मांय जनता अर सामाजिक संगठनारा नुमाइन्दां सागे स्थानीय निकायां अर पंचायती राज संस्थावां मांय अन्य पिछड़ा वर्ग रा उम्मीदवारां सारू राजनैतिक आरक्षण रा बारा मांय जाणकारी लीनी।

वे बतायो के आयोग वाज़िब लोगां ने नुमाइन्दगी दिरावण सारू रपट तैयार करेला। ई बाबत् आयोग राजनैतिक, सामाजिक, शैक्षणिक अर आर्थिक पिछड़ापन री ठा करण सारू सर्वे ई करावेला।

000

मुख्य सचिव वी. श्रीनिवास 'पंच गौरव योजना' ने राजस्थान रा पंचमुखी विकास री खास पहल बतायी है। वे आज ई योजना रा तैत कर्या जा रह्या कामां रो जायजो लेवण सारू अहलकारां सागे मीटिंग मांय बोल रह्या हा। 'पंच गौरव' योजना रा तैत हर ज़िला रा एक उत्पाद, एक उपज, एक खेल, एक वनस्पति अर एक पर्यटन स्थल ने बधावो दियो जा रह्यो है। मुख्य सचिव ई योजना रा तैत सगळा कामां ने तैय मियाद मांय अर पूरी गुणवत्ता सागे पूरा करण रा हुकम दीना।

000

पांचवां खेलो इंडिया यूनिवर्सिटी गेम्स आज जयपुर मांय सरू व्ह्या। जयपुर रा सवाई मानसिंह स्टेडियम मांय उद्घाटन जळसो राख्यो जा रह्यो है। इण मांय मुख्यमंत्री भजन लाल शर्मा, केन्द्रीय युवा मामलात अर खेल मंत्री मनसुख मांडविया अर राज्य रा खेल मंत्री कर्नल राज्यवर्द्धन सिंह राठौड़ ई शामिल व्हे रह्या है। जळसा मांय पुलिस बैंड री प्रस्तुति सागे राज्य री कला अर संस्कृति रो दरसाव निजर आवेला। ई दौरान प्रधानमंत्री रो संदेश ई बांच्यो जावेला। इण मांय देशभर रा 230 विश्वविद्यालयां रा करीब पांच हजार विद्यार्थी—एथलीट 23 होड़ा मांय शामिल व्हे रह्या है। पेश है म्हाणा खबरनवीस री रपट—

राज्य मांय पैली दफ़ा व्हे रह्या आं खेलां सारू जनता मांय उमाव निजर आ रह्यो है। एक नौजवान कह्यो की इण ऊँ राज्य रा खिलाड़ियां ने बधावो मिलेला।

एक और खिलाड़ी ई वां रो अनुभव बतायो।

000

देवस्थान मंत्री जोराराम कुमावत आज वरिष्ठ नागरिक तीर्थ यात्रा योजना रा तैत पाली ज़िला रा जवाई बांध ऊँ जगन्नाथ पुरी सारू खास रेलगाड़ी ने हरी झंडी बता र रवाना कीनी। ई मौके श्री कुमावत कह्यो के राज्य सरकार बत्ता ऊँ बत्ता बुजुर्गां ने मुफ्त अर सुरक्षित तीरथ करावण री कोशिश कर रही है। आ गाड़ी पाली, जोधपुर व्हेती थकी जगन्नाथ पुरी जा रही है, जिण मांय सिरोही, जालोर, पाली अर जोधपुर समेत न्यारा—न्यारा ज़िलां रा 970 बुजुर्ग शामिल है। ई कार्यक्रम मांय पंचायतीराज राज्यमंत्री ओटाराम देवासी ई मौजूद हा।

000

विधिक कार्य मंत्री जोगाराम पटेल लूणी विधानसभा हलका री सांगरिया ग्राम पंचायत मांय पीवण रा पाणी री 1 करोड़ 44 लाख रुपया रा खर्च वाळी परियोजनावां रा काम री सरूआत कीनी। ई मौके वे कह्यो के अ परियोजनावां रामदेव नगर अर गणेश नगर समेत न्यारी—न्यारी कॉलोनियां मांय पीवण रा पाणी री पूर्ति तैय करेला।

000

पत्र सूचना कार्यालय रा प्रधान महानिदेशक धीरेंद्र ओझा आज जयपुर मांय सूचना अर प्रसारण मंत्रालय री मीडिया इकाइयां रा अहलकारां सागे मीटिंग कीनी। ई दौरान वे केंद्र सरकार कानी ऊँ जनता रा भला सारू चलायी जा रही योजनावां रो फायदो हर एक जणा ताई पूगावण सारू मीडिया इकाइयां बीचे तालमेल अर मिल र काम करण माथे ज़ोर दीनो। श्री ओझा सोशल मीडिया, आउटरीच कार्यक्रमां अर नुवी तकनीक रे जरिये सरकारी योजनावां री जाणकारी बत्ता ऊँ बत्ता लोगां ताई पूगावण बाबत् कह्यो।

मीटिंग मांय पीआईबी जयपुर री अपर महानिदेशक ऋतु शुक्ला महकमा रा काम अर संचार अभियानां रा बारा मांय जाणकारी दीनी।

000

हिन्दी फ़िल्मां रा नामी एक्टर धर्मेन्द्र देवलोक व्हे गया है। 89 साल रा धर्मेन्द्र आज मुंबई रा एक अस्पताल मांय आखिरी सांस लेनी। साल 1935 मांय पंजाब मांय जन्म्या धर्मेन्द्र दिल भी तेरा हम भी तेरे ऊँ फिल्मी सफर री सरूआत कीनी अर शोले, सत्यकाम, चुपके—चुपके, मेरा गाँव मेरा

देश, नौकर बीवी का, आई मिलन की बेला, प्रतिज्ञा अर धरमवीर सरीखी ज़ोरदार फिल्मां दीनी। 60 साल ऊँ बत्ता बगत रा करियर मांय धर्मेन्द्र 300 ऊँ बत्ती फिल्मां मांय काम कीनी। वां ने 1970 रा दशक मांय दुनिया रा सब ऊँ लुभावणा पुरुषां री फेहरिश्त मांय शामिल करी ज्या हा। साल 2012 मांय धर्मेन्द्र ने पद्म भूषण पुरस्कार ऊँ नवाज़ी ज्या हा। धर्मेन्द्र साल 2004 ऊँ 2009 तांई बीकानेर ऊँ भारतीय जनता पार्टी रा सांसद रा तौर ऊँ ई जनता री सेवा कीनी। राष्ट्रपति द्रौपदी मुर्मु, उपराष्ट्रपति सी.पी. राधाकृष्णन अर प्रधानमंत्री नरेन्द्र मोदी धर्मेन्द्र रे देवलोक व्हेवण परा शोक जतायो है। राज्यपाल हरिभाऊ बागडे धर्मेन्द्र ने सिरधाभाव सागे याद करता कह्यो के फिल्मी दुनिया ने धर्मेन्द्र रे जावण ऊँ कदे ई पूरो नी व्हेवण वाळो नुकसाण व्ह्यो है। मुख्यमंत्री भजन लाल शर्मा ई धर्मेन्द्र रे देवलोक व्हेवण परां दुःख जतायो है।

000

सरदार वल्लभभाई पटेल री डोढ़ सौ जयंती रा सिलसिला मांय राख्या जा रह्या कार्यक्रमों रा तैत केन्द्र सरकार रा माय भारत केंद्र री ओर ऊँ बारां ज़िला रा किशनगंज ब्लॉक मांय आज सरदार यूनिटी मार्च' पदयात्रा निकाळी ज्यी। वठे रा विधायक ललित मीणा पदयात्रा री सरुआत कीनी। जिला युवा अधिकारी कुमार मधुकर बतायो के ओ अभियान सरदार पटेल रा 'एकीकृत भारत' रा नज़रिया ने प्रधानमंत्री मोदी रा 'विकसित भारत' मिशन ऊँ जोड़े है। ई मौके वंदे मातरम् गीत ई गायी ज्यो।

000

सिख पंथ रा नौ वां गुरु श्री तेग बहादुर री 350वीं शहीदी शताब्दी सिरधा भाव सागे मनायी जा रही है। ई मौके पाली रा सूरजपोल गुरुद्वारा मांय अखंड पाठ करी ज्यो अर सिंज्यां री पोर खास कीर्तन अर कथा रो कार्यक्रम राख्यो जावेला।

प्रधानमंत्री नरेन्द्र मोदी गुरु तेग बहादुर रा 350 वां शहीदी दिवस रा सिलसिला मांय काल सिंज्यां हरियाणा रा कुरुक्षेत्र मांय राख्या जावण वाळा कार्यक्रम मांय शामिल व्हेला। ई दौरान वां रो खास सिक्को अर यादगिरी मांय डाक टिकट जारी करण रो कार्यक्रम है। गुरु तेग बहादुर रा 350 वां शहीदी दिवस रा सिलसिला मांय केंद्र सरकार एक साल तांई चालण वाळो स्मरणोत्सव मना रही है।

000